

## üErich Bolinius

Bericht über den BSV Kickers Emden

Sendung „Flutlicht“ auf Radio Ostfriesland

**Donnerstag, 17.11.2011 18.00 Uhr** auf 94.0 bzw. 87,7

Moin, leev Toehörers!

Dat was ennelk maal weer 'n blied Naricht. Kickers Emden kann buten ok noch winnen! In Lünebürg wurr lesd Sönnitag mit 3:1 wunnen. Dorbi sach dat in Vörfeld för Kickers gaar neet so goed ut. Die Spölers **Thilko Boekhff** harr wat mit Knee, **Aaron Thalmann** un **Steven Janßen** harren so 'n Verkollereei, dat se gaar neet mit na Lünebürg fahren sünd. Dorna harr Trainer **Uwe Groothuis** blot noch twee Feldspölers un 'n Torwart up Ersatzbank sitten. Un **Julian Bennert** harr noch 'n Sküddelfröst, as he smörgens in de Bus na Lünebürg insteg. Man he beet sük dör un belohnte sük in de 64. Menüte mit 'n Tor toe dat 2:0. Dorna was dat Spöl so goed as lopen. De Kickersmannskupp leet bold keen Kansen för de Gastgevers toe. Un 'n paar Wietsköten pareerte Torwart **René Carstens** heel best.

Al in de eerst Halvtied harr Kaptein **Andreas Gerdes-Wurpts** Kickers mit 'n Dreiskoet in Föhren brocht. Dat was in de 43. Menüte. Na de Wessel leet Kickers neet na un knüppte an de goed Spöleree in de eerst Halvtied an. Dat 2:0 dör Julian Bennert gaff noch mehr Sekerheit. **Malte Müller** gaff Lünebürg mit 'n Elfmeterstor sotoeseggen de Gnadenstöt. Dat mook ok nix mehr, dat in de Naspöltied **Felix Beck** Tor för Lünebürg skoot. Hier sach de ansük stark Torwart Cartens neet heel goed ut. He unnerleep 'n Flank. „Dat was 'n heel goed Spöl, un vandaag hett einfach alls passt“, meente Trainer Uwe Groothuis na 't Spöl hoog toefree.

Wat mi aber leep stört is, dat dat bold elke Dag wat over de Finanzen van Kickers Emden in de Bladen steiht. Word dat lanzert? Oll Kamellen worden as neei verköfft. Man kann bold löven, dat dat so is. Ik hoop, dat Kickers Emden bold weer in beter Fahrwater kummt, up Platz un in de Vörstandsarbeit.

För de Toekummst is mi för Kickers Emden neet bang, wenn de finanzielle Saken regelt sünd. De B-Junioren- und A-Jögdmannskupp van Kickers Emden sünd heel bestens. De B-Junioren, dat is de U -17 Mannskupp, hemmen lesd Weekenenn in de Neddersassenliga de Braunschweiger SC Ascosta mit 3:0 slaan. Trainer **Torsten Hoppe** was best toefree. Un de A-Jögdmannskupp van Kickers hett in disse Saison in de Neddersassenliga noch keen Spöl verloren un liggt blot, wall se **een** (!) Tor minner as Langenhagen skoten hett, up Platz 2. Trainer **Yasin Turan** hett dor 'n prima Mannskupp förmt. För de eerste Mannskupp van Kickers Emden löppt dat in disse Saison, as al seggt, neet so goed. Se mutt Saterdag um Klock twee in de Oostfreeslandstadion in Emden tegen Hildesheim winnen. Dann sücht dat ok för disse Mannskupp weer beter ut. Un up de Hövdversammeln an 24.11.2011 is dann de Stimmung ok völ beter, as wenn weer verloren word. Ik tipp up 'n 3:1 för Kickers.

So, nu, as alltied, 'n kört Foetballwitz.

„Och“, stöhnt Elli, as se in de Arms van Gerd liggt, „ik koom ja bold neet weer bi. Wor hest du so drömhaf küssen lernt?“

„In mien Foetballverein. Ik blaas dor al siet 3 Jahren de Ballen up!“

So leev Toehörers van Radio Oostfriesland,  
ik hoop, Joe hett dat Plattdütsk gefallen, denn mien Motto heet ja alltied,  
plattdütsk dürt - nettso as Kickers Emden – neet unnergahn.  
Bit anner Maal

Joe  
Erich Bolinius ut Emden-Petjem.